


Վերծանելով լռության ձայնը

(աքսորական Խաչիկ Խաչիկյանի նամակները)

Գրել բռնադատվածի մասին, կնշանակի վերծանել լռության ձայնը: Ծնվել գաղթականների ընտանիքում և լռել ոչինչ չիմանալ Ցեղասպանության մասին, լինել բռնագաղթածի որդի ու թոռ ու չխոսել նրա և այդ մասին. լուսավոր քսաներորդ դարում այս մանկուրտիզմը հնարավոր էր միայն սովետի իրականության մեջ:



Խաչիկյան Խաչիկ Դանիելի, ծնված 1905 թ Թալինի շրջանի Այնալու գյուղում: Կալանքի է վերցվել 04. 03. 1932 թվականին: ՀԽՍՀ ՆԳԺԿ եղակի 1938 թվականի մարտի 10-ի որոշմամբ ազատազրկվել է 10 տարով այն բանի համար, որ նա 1932 թ կապվել է հակահեղափոխական դաշնակցական անձանց հետ և ամեն միջոցներով օգնել նրանց:

ՀՀ դատախազության 1991 թվականի ապրիլի 25-ի եզրակացությամբ Խաչիկ Խաչիկյանը ԽՍՀՄ Գերագույն խորհրդի նախագահության 1989-ի հունվարի 16-ի՝ 30-40-ական թթ. և 50 թթ. սկզբներին ռեպրեսիայի գոհերի նկատմամբ արդարությունը վերականգնելու լրացուցիչ միջոցառումների մասին հրամանգրի 1-ին հոդվածի հիման վրա ռեաբիլիտացիայի է ենթարկվել:



Խաչիկ Խաչիկյանը ծնվել էր 1905 թվականին, բայց ոչ թե Այնալու/Դավթաշեն/ գյուղում, ինչը ժամանակին տարածված սխալ էր, այլ Արևմտյան Հայաստանի Մասուն գավառում, Պերմ գյուղում:

Ովքե՞ր էին Խորհրդային Հայաստանի թուրքահայերը:

Բարձրադիր Մասունում 1915 թվականի գարնանը սկզբում ապաստան գտան կոտորածից փախչող շրջակա բնակավայրի հայերը: Մասունի 80. 233 հայ բնակիչների ոչնչացման համար, ովքեր միշտ էին ապացուցել, որ առանց մարտի չեն հանձնվելու, 30.000 հայ ու քուրդ էին պաշարել անառիկ Մասունը, և նրանց դեմ կանգնած էր 1000 սասունցի հայ՝ հրացաններով (Ռայմոնդ Գևորգյան «Ամբողջական Ցեղասպանություն»):

Մարտնչելով, նրանց մի մասը փրկվեց ու ապաստանեց հիմնականում Թալինի շրջանում, տեղանքի ու բնության նմանության համար: Նա՝ Խաչիկ Դանիելի Խաչիկյանը, տասը տարեկան էր գաղթելիս:

Ի՞նչ ուներ աղետից փրկված տղեկը 17 տարի անց, 1932 թվականին, ապրում էր գաղթած համագյուղացիներով բնակեցված գյուղում, ազգականների հետ հարևանությամբ, ինչպես հին էրգրում, ամուսնացած էր գեղեցիկ հայուհի Մանեի հետ, երկու դուստր ու որդի ուներ, սիրող մայր ու քույր... Երազանքներ ուներ 27 տարեկան երիտասարդը ոտքի կանգնելու, հայրենակորույս մորը ապավեն լինելու, գավակներին կրթության տալու:



Բայց և այնպես, ինչպես կասեն վանեցիները, եթե սասունցի ես, երիտասարդ ու գրագետ, սովետ միության առաջ ի բնուստ մեղքեր ունես: Հատկապես ծանր է եղել Թալինի ու Շիրակի թուրքահայերի վիճակը: Արևմտահայերի տներում նույնիսկ երգելն ու պարելն էր արգելված: 1926 թ հետո փախստականներին խստիվ արգելված էր խոսել Ցեղասպանության և երգիր- հայրենիքի մասին:

Ովքե՞ր էին, ի վերջո, նրանք, խորհրդային գյուղացիներ, ամենօրյա ծանր աշխատանքով հանապազօրյա հացը վաստակող, «Մասուն վերադառնալ ցանկացող հերոսներ՝ թ»/Քոչարի մեղադրականով/, թե երազկոտ կարոտյալներ, որոնց համար «կարոտը տխրություն էր, անուշ- անուշ տխրություն»/Գալշոյան/:


Գալշոյան Մուշեղի Կաթնաղբյուրի հարևան Դավթաշենից 27 տարեկան Խաչիկ Խաչիկյանը ձերբակալվեց 1932 թվականին, ծանր մեղադրանքով՝ «կապվել է հակահեղափոխական դաշնակցական անձանց հետ և ամեն միջոցներով օգնել նրանց», 1938 թվականին տասը տարով աքսորվել ու այլևս չի վերադարձել:

Հայաստանում 1932 թ դաշնակցական գործունեության համար ձերբակալվել է 852 մարդ, Խաչիկ Խաչիկյանը նրանցից մեկն էր: Ընդհարապես դաշնակցական գործունեության մեղադրանք է առաջադրվել 1333 անգամ: 1939 թ Գուլագում 11 հազար 64 հայ կար, Խաչիկ

Դանիելի Խաչիկյանը նրանցից մեկն էր: Հրանտ Մաթևոսյանի ձևակերպմամբ, մարդիկ, ովքեր պատմության դասագրքեր են մտնում իբրև վիճակագրության:

Փոքրածավալ բոկնոտի էջերի վրա գեղեցիկ ձեռագրով շարադրված՝ աքսորից տուն ուղարկված նամակների միջոցով վիճակագրությունից կյանքայնացնում ենք մեկ հայ մարդու: Նամակները գեղագիր են, գրագետ, մինչև 1936թ ուղղագրությամբ, ուղղված քրոջը, կնոջը, որդիներին՝ **անխիղջ քույրիկ, անգութ Մանե, իմ ծաղիկ Գառնիկ**

Նամակ քրոջը, վշտացած՝ քույրիկ, չնեղանաս իմ այս գրվածքից



«Քույրիկ Ադաթ,

Ընդունիր յերբայրական բարևներս, յեթե կամիս ինձի հարցնել, վոչինչ, կապրիմ, դեռ չեմ մահացել, այնպես որ դուք բոլորն էլ կը կարծեք, որ յիս այստեղ պիտի մեռնիմ, իսկ դուք կենդանի մնաք: Քույրիկ, կարծեմ որ 1938 թվի ոգոստոս իլի սեպտեմբեր ամիսնիր, լերբ յես ձեզանից մի նամակ ստացա, որտեղ գրված էր որ ջուրն արյուն չի դառնա: Բայց 40 թվին կարծեր վոր արյունը ջուր վոչ թե կարծեմ որ ավելի է անպետքացել և արյուն հետըզ հետե կը վոչընչանա, յերբ որ քույրիկ չնեղանաս իմ այս գրվածքից իմ աչքերիս առաջ տեսնում իմ այս թըշվատ վիճակ ու ձեր վերաբերմունքը, վոր այս որ լրացավ 8 ամիս, յերբ յես ձեզանից վոչ մի տեղեկություն չունիմ, չնայած որ այս իմ նեղ ... 3 հեռագիր դրկեցի և այսպես վոչ մեկի պատասխան չստացա և այստեղ գալիս եմ հարյուր տոկոսով որ իմ տնտեսությունը բոլորը մահացել են և դուք ինձ չարչարումիք, չեք ուզում ինձ գրել, ավելի վատիք անում, վորովհետև յերբ իմանամ վոր չկան, իսիղջըս հանգիստ կը լինի և այդքան չեմ տանջվում ու մաշվում:

Քույրիկ ջան, այս իմ վերջին նամակը կը լինի լավ հավատացած, վոր յեթե այս նամակի պատասխան ինչվոր ճիշտնե չը գըրիս, լավ հավատացած եղի սդիպյալ կը լինեմ ինքնասպանություն վերջ կտամ իմ այս յերջանիկ կյանքին: Քեզ վերջին խոսք քանի վոր տանջվումիմ գիշեր-ցերեկ, քանի որ գիտեմ վոչ ազգ ունիմ, վոչ բարեկամ, գիտեմ վոր վոչ վորքել իմ մասին չի հոգում և չի ափսոսում: Յիս մտածումեյի ոտարության մեջ չընայած վոր հանգուցյալ մայրիկըս մահացել է, բայց դարձյալ իմ ազգականներս և բարեկամներս ինձ կը մխիթարեն ինչ դուրս յեկավ, հակառակ, ավելի ցավերս ու ավելի մտածմունքըս խորացավ, թե որինակ,արդյեք ինչե պատահել, վոր նամակ չկա, քույրիկ ջան, մահ միր բոլորի համար է, մի կարծիք որ դուք չը պիտի մեռնիք, յես խնդրում եմ ինչ կա թաքցնել, ավելի վատ եք անում: Յես խնդրում եմ անպայման ինչ վոր ճշտություն է ինձ գրիր Մանեյի մասին. Մահացել է,

բանտարկվել, գնացել է թե տուն է, ինչ որ ճշմարտությունն և յերթե կընդունի նորից գրիք վոր ինչ է պաջառ վոր նամակ չի գրում:


Գրեցեք ձեր առողջության, ձեր աշխատանքների մասին, գյուղացիների մասին մեկիկ-մեկիկ, այս տարվա բերքի մասին, հարևաններին հանփյուրիք իմ կողմից

Յերթե կը կարողանաք, իմ յերեխաներին ասա, վոր ձեր հայրիկ բարեւ ունի ձեզ:

Քեզ սպասող քո յեղբայր թշվառ Խաչիկ, Խաչիկ

09.09.40 թվին

Նամակ որդիներին. կյանքս կախված է ձեզանից ու դուք ինձնից հրաժարվում եք



«Միրելի և անմոռանալի վորդիներ

Գալիս եմ հարցնելու ձեր կյանքի վողջությունը: Եթե դուք էլ կամիք ինձի հարցնել, վոչինչ, կապրիմ, միայն իմ ցանկությունն է, որ ձեր առողջությունն իմանամ: Այսօր լրացավ 8 ամիս ձեզանից տեղեկություն չունիմ և մտածմունքի մեջ տառապում իմ:

Միրելի վորդիներ, միթե դուք չեք կարող ինքներդ նամակով տեղեկություն գրել:

Միրելի վորդիներ, հույսս կտրում եմ այն իմաստով, վոր դուք բոլորովին ինձ մոռացել եք: Չնայած որ մինչև վերջերս ամեն կողմից եթե բարեկամներ ու ազգականներ չեն մխիթարում նամակով, բայց իմ յերեխաներս արդեն դպրոց են գնում և կարող են ինձ մխիթարել այս դժբաղդ ոտարության մեջ, բայց դուրս եկավ ինչ, յես այս տեղից չեմ կարող պարտավորեցնել:

Հոեփսիկ, կարծեմ որ արդեն դուն 3-4-րդ խումբն ես և դուն կարող ես մանրամասն գրել ձեր տնտեսության մասին, թե ինչե պատահել, որ նամակ չեք գրում: Գրիր, վորդի ջան, ինչ որ պատահել է պարզ գրիր. Յերթե քո մայրիկն է մահացել, նորից գրիր: Կյանքս կախված է ձեզանից ու դուք ինձնից հրաժարվում եք: Իսկ եթե կենդանի է, ինչու է հրաժարվել ինձ նամակ գրիլուց, հայրիկս պահանջում է ճիշտ գրել: Միրելի բալիկներ, 3 հեռագիր սովեցի ու վոչ մեկի պատասխան չստացա այդ բոլորի հետևանքով որ բոլորդ էլ մահացել եք:

Մանե այս մի տող քեզե պատկանում, եթե կենդանի ես, տուն ես, նամակ չես գում, ամոթ քեզ, ուրիշ վոչինչ չեմ ասում: Միրելի վորդիներ, ընդունեք հայրական քաղցր բարևներ ու գրկահաս հանփույրներ: Իմ թշվառ կյանքի վիճակը և անմիջապես ինձ կը տեղեկացնեք ձեր վողջ լինելը, մինչև չստանամ նամակ այլևս բարևներ ձեր թշվառ հայրիկից:

Միբեյի բալիկներ, խնդրում եմ յոր անպայման գնաք իմ սիրելի մայրիկի գերեզմանի վրա և ասեք նրան, որ մեր հայրիկ քեզ բարև է ուղարկել: Այս խնդրածս չմոռանաք:

Մանե, կենդանի ես, ինչ ես լռել, ինչու չես խոսում, քարես կտրել, տժվարություն չես կարող տանել, թե թշվառացյալիս օտար իս: 20.08.1939 թ...»:

Նամակներ կնոջը՝ իմ մամայի գերեզմանը չը թողնես քանդվի

«Բարևագիր

Միբեյի Մանե գրում եմ քեզ այս երկու տող

Փետրվարի 15-ին յիս ստացա քո բասիլկան, որ դուք ուղարկել եք հունվարի 27-ին: Այնպես որ այդ մասին անհոգ եղեք, չը մտածես էնպես որ կներեք պատասխան ուշացրի անկախ ինձանից իհարկե, նորից գրեմ, որ անկախ ինձանից:

Բաց անելու ժամանակ վերցրեցին ձեր նամակ ու այն երկու թուղթ, ինչ վոր նամակի հետն էր և ասացին, որ պետք է ցենզուրայի յենթարկեն, նոր հանձնեն, յես էլ սբասեցի իմանամ նոր գրեմ: Բայց դժբաղտաբար մինչ օրս Բայց, Մանե ջան, մյուս նամակս ստանալու պես կը պատասխանիս ինչ նամակ էր և ինչ թուղթեր: Ձեր բասիլկան ստացա 3 բանկա .../անհասկանալի/ շաքար և 4 հատ բաբիրոգ:

Գրիր ձեր մոտ մթերքի էժան ու թանկության մասին, հարևանների յերեխաների մասին

25.02.41 թ.

Գրիլու թուղթ մի քանի լիստ ուղարկած լինեք Մանե ջան, այս խնդիրքը քեզ չը մոռանաս իմ մամայի գերեզմանը չը թողնես քանդվի

Գրիր տեսնեմ ով վորտեղ է աշխատում և ինչ աշխատանք է անում, Պողոսի տնտեսության և իր որպիսության մասին, Աղաթ գնացել է ֆերմա Բասիլկայի չեմ կարող գրել և յերբ պիտի իմանաս որ ես ծխելու ոչ մի հնարավորություն չունիմ, եթե կարող ես և չես նեղանում թուրուն ուղարկի, քանի որ չեմ կարողանում հրաժարվում ծխելուց:


Մանեին գրիր կազմակերպության անունը, անձրևների հեղեղը շատ վնաս տվեց:

Մանե ջան, մոտեցավ երկու տարին, սակայն ինչվոր իմ ծաղիկ Գառնիկի վոչ մի ամգամ չը կարողացա հանգիստ լինել նրա համար: Եթե կարողացար, նրան կը նկարես Մոտեցավ 3 ամիս, վոր ձեզանից վոչ մի նամակ չեմ ստացել, յիս ուղակի զարմանում եմ, թե արդյոք ինչ պատահեց Հանփյուրի իմ Գառնիկի, Հռեփսիկի և Հասմիկի յերեսները : 20 8 1939 թ»

Ուրիշ նամակից՝

«Գրիր պարզ, եթե դժբաղտություն է պատահել, գիտեմ որ մայրիկս մահացել է Գրիր տեսնեմ արդյոք նրան ինչպես թաղեցիք և որտեղ եք թաղել, ինչ հիվանդության պատճառով էր արդյոք, շատ տժվարություն կրեց: Գիտենամ, որ վշտացած սրտով գերեզման մտավ առանցի իր դժբաղտ վորդու ձայնը լսիլու և իր ...վշտացած սրտով սև հողի տակ տանջվիլ Միթե ես արժանի եմ...»:

Ինձ քաղցր կաթ տվող, իմ ձեռքով գոհ գնացող մայրիկ



«Մայրիկ ջան,չէ որ երբ ձեզնից նամակ եմ ստանում, իմ սիրտը հանգիստ կը լինի

Մայրիկ ջան, խնդրում եմ որ դու քո քաղցր բերանից կը խոսիս և Հոիփսիկըս

Յիս լսեցի մի անուշ ձայն, իմ ծերացած մոր մոտ էրփայլեց նշույլ նվիրական բայց ափսոս վոր յերազ էր

Հանփուրեմ քո ձեռքը մայրիկ ջան, ջան մնամ նամակիդ սբասող քո վորդի Խաչիկ Խաչիկյան Փետրվարի 2-ին, 1940 թ.:

Միրելի մայրիկ ջան, Ընդունիր քո անկեղծ որդի Խաչիկից քաղցր որդիական անուշ բարևներ Լրացավ մոտ յերկու տարի վոր քեզանից հեռացել եմ, քանի որ այս երկու տարի չեմ լսել մայրական անուշ ձայն ու մայրական քաղցր փաղաքշանք, բայց մայրիկ ջան, էլի գրում եմ, այլ քեզ յերկար կյանք ու առողջություն: Չեմ կարողանում քո մեղկերի տակից դուրս գալ մայրիկ ջան, Հանկիստ կինաս և իզուր տեղ քեզ լալով չը տանջիս, որքան որ հանկիստ լինես, սիրտս հանգիստ կը լինի

Եվ իմ ցանկությունը, որ ժամանակին կարողանամ քո կենդանի վուսկորներ իմ աչքերի առաջ տեսնեմ և այն ժամանակ թող իմ սրտումս ... հավերժական կամքը մահվանն այն ժամանակ սիրտս հանգիստ կը լինի, սիրտս չի վրդովի և չեմ տանջվի: Մայրիկ ջան, քաղցր մայրիկ ջան

Ինձ քաղցր կաթ տվող, իմ ձեռքով գոհ գնացող մայրիկ

Մայր, մայր, մայր, վորքան կանչեմ դարձյալ մայր

Մայրիկ ջան, հանփուրեմ քո ձեռքերը Մանե ջան, իմ կողմից պահանջում, խնդրում եմ ամեն մի ժամանակ հոգալ հանփուրեմ քո ձեռքը 20 8 1939 թ»:

Գայանե Մկրտչյան

Հ.Գ.- Տարիներով եղել եմ իմ ազգականի տանը, զով Դավթաշենում, բայց ոչ մի խոսք չի հնչել, թե ուր է ընտանիքի հայրը: Այդ ժամանակ դադե Մանեն /դադեն թվում էր պատվանուն՝ տիրուհի, իշխանուհի, ում ձեռքին են ընկույզի /ընդուզ/ մառանի բանալիները/, անտարիք ու անհասկանալի պինդ կաղմվածքով, մի քանի ծալ սև զգեստների մեջ ամառ-ձմեռ պատսպարված, գեղեցիկ դասական դիմագծերով, խստահայաց, ծանրախոհ կին էր:

Աղջիկները հարևանությամբ էին ամուսնացած, բազմազավակ ընտանքիատեր, Գառնիկ և ամուսնացած էր և միասին էին ապրում՝ ըստ ավանդականի: Չէին խոսում, որ մեծ գաղտնիք ու հարգանքի արժանի վիշտ կա, հիմա կարող եմ վերծանել որդու՝ անձնվեր, անսակարկելի սերը մոր նկատմամբ, և մոր՝ բոլորանվեր կառչածությունը որդուն, որը հնչում էր՝ Կառնիգ, լատ...

Արդեն կենդանի չեն դադե Մանեն, Գառնիկը, Գառնիկի կինը՝ հարազատ մորաքույրս, ու իմ ձեռքին են մաշված նամակներ և հին նկար և գրում եմ մի մարդու մասին, որի ոգին, հիմա եմ վերծանում, եղել է ինձ մշտապես հյուրընկալած այդ շոայլ տանը: Հիմա եմ հասկանում, որ մեկ անգամ դադե Մանեի գաղտնիքի, մեծ վշտի ակամա վկան եմ եղել: Ամռան այդ կեսօրին բոլոր երեխաները քնած էին, և տան կանայք ինձ չէին նկատել հսկա ընկուզենու ստվերում: Կառույցը փլվելու, ամբարտակը խորտակվելու նման էր սկիզբը՝ «Չինո, լատ, տնի իմ նման տանջվուկ իս», աղետավոր էր զուսպ կանանց միասնական, ողբերգական հեծեծանքը:

Կենդանի չեն դադե Մանեն, Գառնիկը, Գառնիկի կինը, բայց վստահաբար անտեր չի գաղթական մեծ մայրիկի գերեզմանը, քանի որ ընտանեկան գերեզմանոցում անխնամ շիրմաքարեր չեն լինում:

Հավերժ 35 տարեկան պապի անվանակից, ինժեներական կրթությամբ Խաչիկ Խաչիկյանի որդին, ճարտարագիտականի ուսանող Գառնիկ Խաչիկյանը, օրերս վերադարձավ հայկական բանակից: Եկավ շարունակելու ուսումը, իրագործելու թուրքի ու սովետի անմեղ զոհ Խաչիկ մեծ պապի պատգամը, հղված հեռավոր աքսորից՝ ոչինչ չխնայեք որդուս ուսման համար, քանի որ ուսումն է հետագա փրկարար: